

四庫全書

集部

欽定四庫全書

集部

劉源文集卷十五

詳校官中書臣閔思毅

主事臣呂雲棟覆勘

覆校官中書臣方大川

校對官學正臣李巖

謄錄監生臣于希賢

欽定四庫全書

剡源文集卷十五

元 戴表元 撰

墓志

安陽胡氏考妣墓志銘

大德壬寅歲余來錢塘授徒且五年識安陽胡士謙於中書行署恂恂然儒也於是諸公憐余老而加窮薦授之一官將行別士謙則方圓其齊衰經在苫塊之中越再旬介友人以其母夫人行述來謁銘且曰今將奉柩

歸以明年癸卯歲秋某月某日合窆於安陽柴庫村先
府君之兆惟先府君之死與葬處蓋不忍言幸哀而併
銘之按府君諱泰字通父胡氏夫人王氏俱彰德安陽
人胡氏世長者至府君父諱仙當金時選充行軍副統
壽九十而終生四子府君於次在三資特粹厚幼好學
遂通贍經史居家庭鄉閭以孝謹聞嘗典掌本郡財賦
有貸府君私錢踰期不償者一不問比其死携券對几
焚之至元十一年以差籍從軍南伐道遇士卒急難常

挺身救護全活者甚衆謂人曰此輩皆此方良家子弟
設不幸不以正命死將何面目見父母妻子乎十二年
守鎮黃州充管軍總管府知事十四年夏五月司空山
等寨賊發劫黃州吏民驚散府君獨誓死不去仍以義
倡其衆力戰拒守少頃賊來益多遇害夫人父諱聚清
慎無餘資夫人當筭為擇良對得府君壻於家府君死
黃州時長子方十六處益也次子處敬方十三夫人當
盛年以貞節刻苦自勵日夜力鍼紉機杼取其贏供師

資費二孤賴教督皆成人處益今以行署秩滿授從仕郎淮東淮西道宣慰使司都事處敬浙東勸農司書吏意天之念之幸而及於官祿得以婆娑壽考酬其前勤而夫人苦風濕疾以去年辛丑歲十一月三十日死矣嗚呼茲豈可不為嗟痛惋慕而慷慨引義節如胡氏考妣者儕之古烈丈夫烈婦疇不謂宜哉府君年四十四夫人年六十四孫男二人曰怡曰默孫女三人銘曰婦義於後夫忠於前嗚呼此安陽胡氏一門二烈之阡尚

百年千年無震無騫

曾君墓志銘

江西之曾以氏雄者三南豐其甲也有居金谿之眉東
山曰曾君叔翔父其先由南豐徙余遠不及識而讀其
狀識君所從遊師友若周義山吳允文之屬皆東南知
名士即君之器業淵源風采固可以次論焉君諱一鶚
字叔翔父少亢爽有奇骨曾祖琳祖次點父東山居士
洪世以問學相授居士既蚤夜勗君於家稍長遣出使

縱交聲漸氣靡靡不通究時方崇進士舉顧於此不得志雖豪傑無以自振儕輩十五六通顯矣君浮沉其間不倦不愆然性明決常高持風裁見鄉人過誤多面折少容貸及有不能可否事質成於君是是非非應口剖析聞者犁然而服也母胡氏卒居士年浸高君承薦寢膳冬溫夏清晨昏起居無違禮居士壽考令終而季父病奉季父湯藥如居士時事兄順家事諮而後行撫諸弟友愛有善獎之少不謹警之患難則扶持之延良師

淑二息族子弟有佳質亦糾收之治家嚴內外而好客
恢疎樂易留連詩酒頽然竟日人莫測其雅量鄰有急
難赴之恐後至賙窮賑乏尤不靳丙子之潰所在無寧
居或相譁張為閔君以靜鎮囂衣冠細弱依而全活者
不可勝數他日居士塋送車縞素傾村空郭出纍纍百
餘里不啻皆前日受恩客也其閒居不言而教成無權
而惠行往往類古義烈士去家五里所得萬石塘林壑
盤蔚有鶴巢龜峯之目君築室其下扁以龜鶴隨隱義

山諸公嘗為賦詩甚奇並溪種梅亦號梅溪翁琴書壺
奕將婆娑以延老至元三十一年正月二十七日遂卒
卒之日遠近士大夫知君者舉痛惜之嗟乎使翔父君
當諸公無恙時亦策一名不過循例如是而止今諸公
所成就幾何叩其顛末有不忍言而君生有及於物死
無愧於已詩書滿門哀榮稱情非天道有以伸之而然
乎君前卒以歲除夕得疾越一月少間家人以為喜忽
索筆疏遺言戒子以不可忘清苦虧友讓意及勿以緇

黃亂喪禮凡累十言又三日而瞑年六十有一娶陳氏
先君三年卒子男二起東起南女二長適承務郎慶元
路治中張與紹次適倪清孫男五鏗鉞鎮錡鏞女六長
適倪詩次適陳聖廣次許適吳相孫餘尚幼諸孤以故
葬緩大德六年十一月某日始克窆於里之流光亭陳
夫人祔銘曰鶴以羸存龜不利走奔予與偕歲兮今復
奚云昭之息潛之獲既堅既謚惟茲幽宅

吳君墓志銘

君諱榮字景榮吳氏饒德興建節之吳唐末逃
黃巢兵由歙徙美樓居號樓下吳家環樓下數里間至
今祠所謂吳尚書其遠祖也曾祖俊章祖次祐父應辰
贈承務郎承務公性冲靜生二子長安行以詞賦中甲
戌進士科調信州貴溪尉次即君少警敏甚母劉夫人
尤愛遂早授勞事以逸親而縱其兄使專意文學家本
儒儉自君為之壑殖日增綱紀日飭奉養日具迨於晚
年遂成高門簪裳軒騶熙恬往來詩書豆觴談笑辦集

悠悠然令人忘死生之憾興廢之戚才乎哉樓下居皆
毀改築栢水栢水者承務公本生家徐氏丘隴所在也
於是君年高經營滋疲諸人質成徼施者四面而至然
平居最急義伯姊難嫁傾其私裝女甥無依鞠如已息
他恤孤撫弱事聞無不為嘗自書一編述大意示子孫
曰棟宇不必華庇風雨足矣田園不必多了伏臘足矣
賓客不可踈在擇交聲名不可貪在立已施予不可吝
在隨力此其施為蘊畜之可窺者也年七十六以大德

壬寅秋九月二十五日卒於正寢卒之日人哀惜之娶
康山許氏子男三長大本次端本早世次建中為承務
公本身家後女一適同邑蘇濤孫男三長德馨次德昌
次德宏女三長適同邑張詔餘尚幼初貴溪尉仕成而
倦遊間以郡檄起領鄉校講道授業無虛日君又恢仁
山之塾豐禮幣美庖膳以招延名師江鄉稱世家多賓
游文雅好禮者必推仁山居士子弟居其間欣然漸於
學問大本既精孔氏尚書復授德馨周易曰吾不能以

罷舉廢業也惟嘗誦道書一夕夢神問南斗經中何脫
二語耶明日以質諸所親取刊本校之良是丙子歲危
病恍惚見修廊廣廈有羽衣人拾刀圭藥授使服之覺
而牙頰間猶隱然丹砂氣疾亦隨愈嗚呼世議之隘士
大夫天資高邁者人人思飛騰高舉脫塵囂機械以為
樂將自不可測邪癸卯冬十月某日大本將葬君於樂
平州公墓塢前事奉天台主簿程君之狀來丐銘銘曰
劬其功美其宗天不惡其豐深其居敦其初人不疾其

疎惟茲新岡孝友之藏後百千祀其固其康

楊氏考妣墓志銘

信弋陽楊君應桂既葬其父府君永年鄉蒲隰尋喪母夫人張氏又葬密石及是陰陽家胥不以為吉乃追用治命改卜於二塋之間得吉將合窆焉書來屬表元銘之始表元年未三十客於金陵君掾當塗有能名纔長一歲耳間以部使者檄同考試補太學弟子員一見結兄弟交於時兩家各奉重親安輿就祿養意氣相顧驩

甚濶絕三十年再來見君鄉州問前事如夢寐憂患病
憊憔悴亦具成老翁於是又相弔以悲銘何可得辭按
狀信弋陽之楊由建徙派出祥符內翰文公府君諱鎔
字子成曾祖和祖崧將仕郎考春迪功郎妣葉氏府君
幼警秀不羣比壯信鄉先生王伯羽學問行誼出諸生
徒右迨二子能受書即擇知名士為師而日以一編程
所業既而應桂遂中乙科人為府君喜府君曰吾期吾
兒不止是也饒信為江東士大夫窟藪景定咸淳中湯

尚書以耆俊謝禮部以忠鯁徐正言以隱逸風采聳然
臨一時應桂東濡西染出聞珩瑛之音入瞻槃杆之戒
不言而成良士至當塗傲僚宿師胥驚怖歎服以為少
年安得乃爾不知其有所受之也襄師潰當國者懸高
爵誘士士來如麻府君曰是尚可為乎應桂僅以文林
資調括蒼元僚以歸聚宗戚保衛赭亭山鄉民依而全
活甚衆久之藍山塾闕長儒望歸應桂不得已許赴之
遇是不敢以請府君天資高邁事不可忤而無含怒蓄

怨馭家有法睦族有愛待賓有禮賙鄰有義謝禮部之
謫富川交遊畏禍不敢造其戶府君獨持贐遠餞至滙
澤語之曰此陸敬輿忠州註本草時也願自愛禮部歸
先寓書道謝語甚切至晚歲以家政付二子時時飲酒
而不至醉以適性吟詩而不傷訐以適意蓋樂天知命
忠厚篤實君子也母夫人之狀曰張氏諱妙靜祖維兩
克鄉貢進士舉父孝友世為弋陽儒家夫人歸府君相
尚勤儉葉夫人性嚴少假借禮部銘其墓所謂治家中

禮者也夫人承迎左右無違順而正慈而節常舉外家
所聞見督二子以虛心好問自諸老處歸聞得一善言
為之喜見顏色府君沒家遷於鉛山之何田以氣疾竟
死何田府君年六十六生嘉定癸未七月十二日也沒
至元戊子三月二十六日夫人年七十二生嘉定己卯
十一月二十日沒至元庚寅十一月十八日今葬以大
德癸卯某月某日子男二長應桂次應得子女二長適
前進士趙嗣惠次適進士游味道孫男三公審志學宏

孫公審早世孫女二長適進士黃進德次幼曾孫男一
愛孫銘曰既有為之華孰得而羸其家既有為之終孰
得而涼其躬惟安惟穆歸茲新卜斲堅書良永閱陰石
游縣丞墓志銘

君諱子賢字俊伯游氏其先世居建之長平歷漢魏隋
唐官緒不絕詳具族祖文清公侶所為譜建亂徙信今
為信上饒人大觀中舉八行有以長子中其科官升朝
積封至中大夫者君七世祖也曾祖某祖某父某俱隱

不仕妣張氏君幼爽敏讀書一目輒成誦十二三作詩賦驚人尋喪父孤苦樹立卒以成學教授鄉里養寡母嫁二妹雖環堵之室困庖屢空而時節設施展敘曲合禮度嘗領鄉貢進士舉洎上禮部試成均同業及所受教者滔滔先登獨坎軻不售辛未歲遂用累舉恩授容州文學改迪功郎轉循職郎調贛州興國主學會文丞相帥贛一見奇君檄主贛縣簿贛令倚君辦其縣事俗好訟有墓獄積年不能決一點胥一譁儒君承牒詣墓

所徵訊得實傳以經律具牘上府決之聞者相戒毋犯
主簿教贛苦淮鹽遠不能致帥委君度嶺運南鹽至則
為鄉人徐經略留攝新會丞司其征賦蓋當是時兵事
新起官府奔播人無寧懷君佐新會廉恪慈恕如平時
公帑之羨不歸私裝商權苛比減從其寬邑有譚氏林
亭為登臨佳處休暇則與寄公僑士觀風訪政其間廣
破鄉民爭迎致藏免君如慈父君亦以耄辭不復出矣
並海買田宅婚男嫁女若將為新會民而終焉初君之

由贛入廣也屬長子應梅居守而次子斯道從迨棄官
新會斯道以崖山巡檢前死越一年君亦死女子嫁新
會者與壻相繼皆死十七年應梅始自上饒間闕數千
里跋涉物色問歷得君殯於新會瀧水里之坳頭村於
是發土撤茨奉餘骨歸葬上饒某山之原以巡檢衣冠
祔兆域焉人嘗疑科舉士無實材予奪得喪若有鬼神
焉戲之君起衡茅用文墨得一邑佐吏不為通顯然所
就落落出人意表上饒人能言布衣時淳祐間徐侯為

禮行經界景定初黃侯蛻招義勇皆君畫策建議臨大
事慷慨有馬周張齊賢之風晚歲流離倉卒身羈家散
竟以客死禍福果何如耶將事出適然而鬼神亦有所
不能盡知其情耶聞義而行知難而退孤老窮蹙僅免
兵革天又遺之賢息使游魂寓魄歸安塋廟然則君之
於此自可無憾世不必皆知君也君嘗種梅於所居南
榮稱君者有梅谷之目年七十五生嘉泰甲子十月卒
至元戊寅正月葬以大德某歲月日配趙氏繼王氏子

男二應梅兩請鄉貢進士斯道女二長壻將仕郎濟南
辛衢次故廸功郎新會尉昭平周可翁孫男二長肖龍
次肖鶉為巡檢後曾孫女一銘曰生為勞儒死羈客腥
風瘴霾魂馬簿不如鄉邱安可樂嗣續展省延遺澤綿
百千祀鎮茲宅

故玉林項君墓志銘

君諱天覺字希聖項氏徽婺源人項以國氏後葉子孫
散處荆揚間揚之項徽為盛所居婺源有山曰巖岨峭

拔奇秀聚族負之而廬且累百年至宋紹興中鄉先生
利用始以文學顯有司三上名禮部雖不仕而其甥月
湖許公錫用所受學去為名卿淳熙中安世父子復發
聞於荆而族相望隱然為東南華門君曾祖童仕尚書
省屬於月湖為妹壻祖維寅浙西提刑司幹辦公事從
外家學以詩鳴父一夔累試補太學不幸早世幹辦公
亦相繼遷謝雀鼠之訟驚於家庭君纔七齡二弟襁褓
母戴氏夫人跋涉挈攜以求直於郡縣於臺於部猶未

免君年十四一日誦魯論至死生有命富貴在天忽蹶然有感曰吾喪吾父喪吾祖又幾喪吾家非天乎割壤以和母敗吾溫清誦絃事戴夫人喜且泣從之自是躬帥二弟承師稟學日記千餘言援筆為文俊氣奕奕不肯休未幾母夫人以疾不視家政君獨持門戶而游其弟於塾當是時徽婺源與饒樂平德興相犬牙號多明經生如吳君遇龍許君月卿沈君貴珏李君睦齊君興龍夢龍之倫皆負場屋重價皆喜從君游每進士三舍

榜出金鈴綵幟震轟電馳華軒蒼蓋鳥集蟻附項氏塾
必在指擬中於是君兄文薦既登甲戌高第而弟若子
迺邇以次克貢方增創玉林精舍益延師招友聚書講
學魁儒勝士四遠如流而來玉林之西有別墅池臺脩
潔花樹秀蔚幸時節閒暇採芳釣鮮以供觴咏於其間
一時規模風致使人娓娓如欲繪畫君少歷艱險長經
離析精於人情世故華皓康裕以造物者憐其愿而娛
之然性不吝滯見義即為遇急張弛尊幼貴賤貴無巨

細得其一言而解仇釋憾多矣戊戌之歲以七袞稱慶
膝下斑斕綵舞者幾三十人羣從姻游可千客君飲酒
談笑應接累日夜不倦最後夜半執酌言曰吾辛苦樹
立偶不墜先業田園雖薄足了汝輩耕織即死亦不為
不壽萬萬無恨因出手抄處置家事條目示子孫且顧
次子之祥之為徐氏後者曰明年今日能復見吾子否
乎心期何所不至恐天不我與耳明年及期復為壽無
恙不越月疾動諸子拜醫請藥君曰天不我與醫藥

何為囑治喪勿用浮屠老子法言畢而逝大德己亥十
一月某日也君生於己丑十月某日也享年七十一初
配同郡張氏檢校公孫女生子男淵然之祥起元德元
繼室康山許氏生福翁吳氏生采孫為宗人斗南後女
一壻番陽教諭徐岱孫男十傳孫良孫蘭孫平孫咸臨
德善性善友善文孫擬孫蘭孫為之祥後孫女二君嘗
自卜地於里之五葩塢以故葬緩及是將用甲辰十月
某日奉窆前事以鄉貢張君之狀來謁銘銘曰遜也而

強約也而康吾觀其人玉雪春陽言行志酬歸藏茲邱
嗚呼永世無震無壽

故禮部進士徐君墓志銘

取士以明經設科垂二千年其法詳記誦精傳註使人
崇本勤業不虛為浮藻而已王荆文公行新經義始命
舉子昉對策依題為文多者遂至汎濫累百千言嗚呼
取士明經授題限晷刻倉卒至累千百言而求上不畔
先王之教與老師宿儒相傳之說下不失有司之程度

豈不甚勞且難哉余來江東聞饒士徐君志禹未弱冠以尚書應鄉貢進士舉入院日未晡不點膏已篇滿成文復紆餘思拓別紙縱筆滔滔成篇同院生仰視交口驚異比揭名君與兄堯龍聯翩居前行再作者亦冠二榜時饒士以尚書為額踰萬計充貢者纔十五人君方妙年逞高才能捷取奇中如是世所稱賈誼陸士衡何足多慕既而其從子之祥以君將葬狀君行來求銘按志禹諱子鄧字志禹徐氏饒德興人徐之世出伯翳傳

偃王以慈棄國民為立祠龍邱依而居者代不乏顯人
唐季有成避亂黃頓子盤游學於饒因家焉是為君七
世祖曾祖允武祖次陳迪功郎循州長樂尉父公著迪
功郎致仕闢東軒數十楹以琴書娛閒自號東軒翁君
少聰穎其學尚書以鄉先輩舒君成大余君木為師宗
人節甫為友間塾櫛比書燈熒熒君雄其間鄉舉之歲
在乙卯人謂明年南宮試乘銳可平掇既不售益自刻
厲曰天將徐之以大吾成乎先是東軒翁以好客聞鄉

里之客有器識能文章者往往聘致結約恐後君繼其志禮鑒有加如程君顯甲洪君以中平生游從最厚自餘吳君安行曹君應龍張君應霖方君清之流以姻以舊朝熏暮摩久而益親晚歲學成行尊世念踈落而故相集賢馬公退休於家時時相過訪道德之遺言攷古今之故實脩然非復少年場屋時徐志禹矣所居西偏舊有會文之齋曰化龍至是增葺改名雨軒嘗謂子弟曰孔孟之道昭如星日學之者可以修身繕性可以康

時濟物秦漢以還異說朋興其慎所習勿為虛誕褻淺者所咻庶幾有益於世聞其言者知君非科舉士且悟雨軒之云將有所潤澤也君承親孝撫弟友處族嫻和雖不顯融充裕而天與公多男子有田可食有經可傳於世未為不遇生以戊戌六月某日卒以大德庚子六月某日享年六十三娶張公廷評公孫女子男五大中積中敏中允中高中女一適同邑張涇孫女二其墓在里之塘源葬緩有故以甲辰九月某日銘曰雖衡且角

雲族而不澤吾藏吾斷以還於冥漠是之謂真宅

游鄉貢墓志銘

余至信州之明年於是上饒游叔大既踰嶺返其先人
新會府君之殯且葬而屬之銘余既哀而銘之越二年
叔大卒其子又亟俾銘焉嗚呼余之不腆其審能信然
於游氏父子之間乎按游氏之譜遠自漢魏隋唐以來
不乏顯者五代避建亂徙信大觀中八世祖以子應八
行科登朝積官至中大夫詳已具新會府君志江南之

族貴進士其法每州率四百人拔其一謂之鄉貢信多
詞賦以詞賦充貢為尤難新會府君起清門挾俊能同
業既讓為先登叔大甫弱冠隨羣授牒輒復得之旗鈴
踵門冠蓋屬途州閭以為榮然叔大資嚴重不切切於
卑近之獲早即從徐巖為陸氏之學者游於時湯文昌
黃台州皆以顯官領祠象山寒鑕暑研頗見條貫遂歸
築室於翁山之陽自號翁山翁癸酉歲以舉首再貢於
鄉將試禮部遭所生父喪不行而舉罷矣初科目士厭

詞賦雕篆無益故試之明日加試論一道又明日加對
策三道以觀其真才試者殊不能並焉叔大自為童時
舉筆已崢嶸驚人迨於成立諸大家不惜禮幣聘致以
為賓師楷則雅善教誘欲學即授以捷法聽受者無留
難晚涉憂患家事日落饘粥因賴以粗給嘗有推轂為
婺源教官者辭不赴惟為郡博士一出當其計會兵燬
後殿廡舍次藉之一新新會府君之入南也叔大居守
而弟斯道從隔絕十七年不得達乃剝心鉅形忘饑渴

瘴潦數千里而求之則皆已死發哭踊擗如喪得二敢
於瀧水坳頭村負骨以歸士大夫聞其事者舉為詩文
以感嘆嗟傷之叔大於人恂慤謹直多忤少合而人矜
其情不為怨宗姻交友遇有所疑必來詢謀燕游談會
經酣史薰琴怡奕暢恢恢然通儒達士也喜為詩以邢
居實之名名其集曰呻吟叔大諱應梅字叔大曾祖諱
曰新祖諱敏父新會丞諱子賢先娶余氏繼周氏子男
二長肖龍有雋質先一年卒次詹為弟岵山巡檢後子

女二適余烈周某皆業儒孫男一隆弟孫女一生辛丑
四月十五日卒大德乙巳二月十八日年六十四臨絕
不囑家事諸孤奉其教居喪不用俚俗禮十一月某日
葬謝郭銘曰生無悔於身死無愧於親吁嗟乎斯人斯
人

剡源文集卷十五

欽定四庫全書

剡源文集卷十六

元 戴表元 撰

墓志

吳孺人江氏墓志銘

大德丙午歲之季冬余將發上饒有儒生吳自徽婺源
不遠數百里來請銘問其葬大母孺人江氏也讀其狀
壻浮梁文學掾操君茂之為也余以禮辭不可則據所
受狀為之辭孺人諱秀字靜貞江氏世居徽婺源之虎

溪其先有諱雲者仕至銀青光祿大夫五世而至叅議公振於孺人為曾祖叅議生三友舉進士於孺人為祖進士生一龍於孺人為父虎溪之上二十里有山曰冲峰嶒嶒峭厲盤繞而為村下有大族吳居之江吳世為婚姻家初孺人之大母汪氏送女於吳識帥厲公之子克珍字賢翁於稚年語其內子齊曰是兒碩貌寡言重遲不戲異日必受成福吾孫女一甚愛擇於他族多矣必嫁是兒媒者曰然卜者曰祥而孺人亦歸於吳孺人

性沉毅聞義即從其始至親饋之次姑誨之曰吾家閨
閨以柔順為法柔故能持剛順故能處逆爾謹識之自
是於吳氏之門承親相夫接族馭隸一準其軌以至白
首嗣主家政吳之上下內外無不悅喜惟訓飭子婦則
嚴不可犯歲時節朔有進新衣者曰吾適體足矣文繡
非所愛也有獻美味者曰多殺而傷慈亟食以易疾不
若蔬食之安也晚歲貨筭益豐不以為意遇窮乏必思
施貸里中多阻溪漲創杠梁以濟涉者尤重儒業文士

詣門朝夕為親視饌膳有加禮坐聞諸孫諷書聲喜津津出眉間或躬攜棗栗以示勸賞每嘆曰吾吳氏積善者累葉矣天不違人必有以詩書顯其在茲乎辛丑九月十八日以疾竟卒年七十五子男二應楊應樵女二孫男五璫瑋環璫玼孫女四曾孫男一頤女一葬緩有故丙午十月某日始窆里之善原銘曰蘭幽而薰玉韞而氛吁嗟賢柔作則吳門後有君子尚考斯文

單君範墓志銘

吾剡源有為明經之學者單氏諱庚金字君範君範初
與余俱以詞賦行州里間有徵名既一再不得志於貢
舉即去而他遊庚午秋予在錢塘叨太學薦送兩浙漕
運使者亦以君範名聞明年春予成進士君範竟守母
喪居廬迨甲戌歲始來就南省別試所乃見黜免於是
遂歸隱剡源晦溪山中者三十年日夜取古聖賢經傳
遺言洗濯磨治家無贏餘口不道營殖面不帶憂愠飲
水茹蔬客至開門清言款接忘倦蓋真以德義自給者

而予解棄官守攜持老稚晚方徙依君範同鄉而居每見之未嘗不內愧也君範卒且葬其孤函裏父所著書及事狀來徵銘按單氏之籍自婺遷明奉化凡三枝居湖山枝稱會稽理曹掾德旗居下邳枝稱鄉貢進士淵而晦溪枝稱君範曾祖光詰祖大年父欽字崇道世醇儒君範知讀書崇道公輟衣食用以供其師妣龔氏尤賢明游學資費取之簪珥無吝惜其書已脫藁有春秋三傳集說分紀五十卷用呂氏程氏所纂自左氏公羊

傳穀梁傳以來諸家之異同定於一書後學得以依據
又解春秋正經題為春秋傳說集略者十二卷又讀論
語去取諸儒本題為增集論語說約者若干卷雜著五
七言詩擬古樂府題為晦溪處士餘力彙者又若干卷
嗟夫君範惟無利祿得喪於心故能善其道全其身若
令得一下士之秩碌碌驅馳塵土中終復何所成就令
居產能致千金裝孰與清素傳子孫之為安然君範性
謙曠非若他人能商略利害為避就往往大山長谷故

家遺俗風聲氣澤陶寫停積而致然乎生己亥十一月十九日卒大德九年乙巳十月二十四日壽六十七娶鄞縣西山吳氏子男二涵池孫女二素心如心以十一年丁未十一月某日葬嵯縣忠節鄉葛竹山之原兆域手自銓製蓋於地理家亦臻其奧矣銘曰大山嶙嶙長流沄沄是為晦溪明經處士之墳百世之下寧無智者勿躡其石勿剪其櫟

趙君理墓誌銘

君諱與崑字君理趙氏明奉化人趙之先皆汴出逃靖
康亂始南來而君為燕懿王德昭十世孫曾祖伯璵宋
通奉大夫妣王氏碩人祖師簡朝奉大夫知澧州兄弟
凡五人俱擢進士科貴顯里人號其居五桂堂妣陳氏
宜人父希耘從事郎嵎縣丞妣史氏孺人君生而貧長
而兵其持家贍親以犁鋤筆硯余識君當十三四時清
羸秀削不類貴家子得錢即置書研獵竒異廣蓄精取
每見必有叩詰審閱幽宏奧妙若有鬼神授之者一日

訪其講廬不遇遇諸郊途問何適曰聞二十里外社廟
有古碑往尋之果然得以證某誤也因喜不自禁嘗示
一文戲以少史漢氣明日復示笑云較史漢氣何如其
苦心慧悟非尋常才子所及而善生殖世墓在州東白
水村買山及陸地開田堰水課僮丁某所種禾菽某所
種棗栗高卑位置具合繩度然平時卷帙不離手初未
嘗見其喜為農圃事也三十復一出遊吳時僚才士舉
慕與之游以病歸竟死白水村不娶無嗣以其兄之幼

子衰經主喪遂葬世墓旁而弟與聲來乞銘嗚呼余實
村居厚君而忍銘君乎而忍不銘君乎君所為雜詩文
散落僅存者若干卷於氏族有姓源於州里有鄞城志
於字書有汗策於謚法有謚譜於古今有聖賢羣輔錄
生甲子十二月二十七日卒大德丁酉七月十三日年
三十四銘曰生之奇曷不益其羸成之疾曷不舒其逸
郭門之東有桂叢叢有麓隆隆聯城異宮祖孫是從

陳府君功父墓志銘

明奉化之陳有自閩來者開族於海陰海陰後名忠義鄉而陳以文章科目遂為鄉大家余弱冠客錢塘姑蘇即及從之遊一門羣從東觚西檠左觶右璫軒軒然而趨嫋嫋然而休也功父君在昆弟間獨詆諧脫略若不屑意時好者余甚異之功父君諱晟伯字功父一字止善曾祖諱聰謀故不仕祖諱師稷善詞賦嘗試進士舉不售去試武舉絕倫又不售輒歸而問道於鄉先生楊文元舒文靖沈端憲之門里閭推尊為儀範壽八十三

以子貴為宣義郎致仕贈朝散郎父諱育孫韜潛篤厚
繡衣公即其伯氏一出仕亟為當途所知用麾馳節奔
不暇私顧因盡任其留事闢廣廈幾千堵瞻同堂數百
指娛適朝散公無虧容每曰仕者養志居者養體其為
孝一也斥餘資倡義於族黨至今歲時序拜樽俎猶守
其遺意晚歲以恩補迪功郎致仕功父君幼習孫吳書
有祖風疎財好義用父道歲丙寅以有階註銓調隆興
軍使轉承信郎辟殿前都統司幹辦公事右司梅公應

發一見竒待舉

原缺

任使制詞有借逕發硯之獎至甲

戌多事急材超轉武節郎將有授任而府罷矣築一區
於所居山之左榜之曰東塾耕舍日求異人元客與之
講駐形鍊氣之說亦以其術拯人疾患時驗雖重費不
計惜既而慕龍虎山清妙徒步往謁尋受其山中師號
以歸晨蔬夕脯午飲三行不至醉曰吾飯用清獻酒用
康節法也迪功舊刊解氏義居圖教戒子姪君繼其為
求施者紛然性篤孝母病不解衣扶掖者數月父病有

加焉既歿躬負土合葬事畢益厭塵濁有長往不返意
以大德九年乙巳八月十日竟卒生乙亥九月三十日
年六十七夫人趙氏諱與康燕邸諸孫先卒二十六年
子男五紹憲紹恕紹俞紹弇紹俞為仲弟後女一適汪
恢春孫男二宜宣於是君所自卜壽藏在耕舍西已山
之原紹憲等將用某年某月某日葬其兆併附趙夫人
而介世好來請銘銘曰獨而獨曰羣而羣不離其人
曰左而左曰右而右不失其我林木之蒼然風谷之琅

然縹縹翩翩歸來乎茲阡

伯妣袁氏夫人遷葬志銘

嗚呼我伯妣袁氏三八夫人之譜由奉化城西管山居
鄞城南世遠不能詳其始所僅可知者外曾大父諱珏
外大父諱伯顯皆不仕夫人歸我伯考拙道居士府君
時家方貧政出祖妣鄭夫人持綜嚴急居士府君惟豁
達好飲酒寸絲勺米心籌手量然後經用猶時時闕絕
又多生育初得女曰鳳娘嫁同里連山王之禮長男表

正次沂次慶孫次表元沂以後鮎埒謝氏姑而表元以
後仲父伯妣夫人慈甚見人窮窶忘已之乏必予之乃
已常被遣出治南山下龍潭村別業村中媼嫗聞夫人
來懽忻服役至有所須不言而如約用此生理少振然
累日重竟悒悒以病歸卒於家乙卯歲九月七日也生
丙寅八月十五日子時年五十時新遭祖考府君憂坊
郭廬舍不能數堵大喪在堂小喪在戶仲父負重衰力
貧以其歲權殯夫人張山下陳園旁以待他日得地而

遷焉表元生年在十二越十四年入太學又二年成進士又二年仕建康又二年自建康歸累徙遂定居剡源榆林家始極貧何暇議遷葬事又七年居士府君卒葬榆林中枝山可以合祔而有所碍不得遷又十七年仕信州又五年自信州歸於是表元年已六十三扶僊往謁陳園之殯不得封樹蕩析耕犁侵之麥芄芄然幾無以容拜展為之心震神悸竊自痛念先大父勤勞多艱生無以奉一日之養死又不得中壽所遺諸孤同氣時

零丁夭折無至五十者獨表元移承旁宗偶幸未死荒
塋車寄沉綿五紀以吾世能念之尚不免棄捐荆杞如
是有如屬䟽事遠何所不至且吾年向老早暮不可知
而貧勢未止不得尚以力薄為解居之東北有山曰紹
地近始愛而蓄之亦既卜吉規以為壽藏於專葬無所
碍乃以大德十一年丁未十二月二十三日啓殯陳園
奉遷而西二十九日改窆紹地中壠壬穴丙向趨迎稠
重環衛秀密望居士府君中枝之麓冠襟而屏机也古

者子不敢銘其親懼以愛溢稱表元銘伯妣夫人以舒
幽懷以期永久銘曰生為勞母而不及承一日之養死
為慈父而不得與同穴之藏日吉辰良作茲新岡凡我
剡源子孫其謹勿忘

故道錄章公墓志銘

章居實法師在錢塘西太乙時余以授徒餘閒常相周
旋見其黃冠羽衣而耽章逢之趣深賢之別去數年當
大德乙巳其徒走狀來江東言居實以去年十月十日

解化於西太乙宮矣某月某日將寔洞霄山中敢請銘
余知師銘何辭按狀師諱氏字居實章氏台黃岩人章
之世多達者至師曾祖某祖某父某俱隱德不仕幼敏
悟總角入鄉校有奇名歲戊辰侍父來杭居紛華之場
而讀書一室端凝如愚人已巳春竹宮繙經往遊觀焉
儀止脩雅應對開爽衆目為屬時大滌諸老咸在遂攜
以入山一山郎公專意育教十八歲為道士命禮四世
孫李某為師至元戊寅擢西湖崇真觀上座兼書記辛

已充元學修撰西太乙宮焚脩丙戌轉台州路道錄以一山公委寄之重不赴庚寅進元學提舉住持龍德通仙宮元真丙申提點佑聖觀事固辭之繼為凝神齋高士兼住持元洞觀大德改元提點元妙觀戊戌充西太乙宮提點知宮復辭明年正月洊被是命辭不獲始就職十一月授杭州路道錄辛丑陞提點知宮力丐仍本職壬寅拜璽書護持師內飭風裁外接光塵所居而理所施而悅初西太乙之失其廬也道侶栖栖然僑寄湖

側偏隘單寒有不堪之色一山公與其嗣逸峰楊公相繼極力補綴漸見端緒師承其後必欲改為以成先志相攸其宜凡杭之中外遠近靡不涉歷乃得一區於楊氏之廢圃面勢而原麓稱卜吉而龜筮叶要成而書契備於是發摶節所餘之緒裒材役工心計身督忘寢食而為之未期年庫舍齋堂丈室即成而師以勞勩致疾然猶不自悔隆寒盛暑跼蹐木叢几架間曰命之脩短天也西宮吾家世事不可不竟性通豁與人交無城府

在元妙元妙之人惜其去在杭錄麗罰者自以為不寬
將迎之需應貸如已責簡文移省勾追代期未滿而退
人高其勇故事餞行有彩帳師以沽譽無益却不受事
一山公三十年驅馳艱險無倦容丁亥入覲宣勤尤至
一山公仙遊與逸峰之喪營奉如禮在通仙建層閣闢
公帑翼使廡宏外門在元同則巨構一切鼎新之錢塘
使客中都官往來如麻師未嘗褻與之覲初若不可干
久而彌敬酬應稍空騷儒韻士絃奕觴咏瀟瀟然清事

起矣世人言仙不可學以為去人道遠故求之茫茫以
余觀之古之名能為仙者其人必皆孝弟清明忠厚然
後得之去人道殆甚近觀師之為人子孫為人師長為
人交友一一無憾使為仙者不絕於世非師輩其誰宜
師將化命左右掖以坐知舊問疾有洒泣者張目視之
曰死生如寒暑晝夜何戚為復就枕遂化嘗名脩真之
居曰耕隱人稱耕隱翁號明素真冲妙法師生於甲寅
十一月二十三日及是年五十一為之嗣者吳貴德胡

仁方水邱浩然等也銘曰以道為樊以氣為馭其形甚勞而心甚豫天目之陽雲庭霧臺師乎庶幾冥冥去來

康濟甫墓志銘

番陽康濟甫卒既敢附於新興鄉查勾源祖塋之旁及是將別卜窆而其孫吉州教授彥博奉族前鄉貢進士南龍之狀來請銘曰吾康氏之世出衛侯封有邯鄲太守誼集衛侯以來至宋初幾百世者為京兆譜陶穀學士為序其徙汴可稱者曰澄唐大理少卿曰保裔宋彰

信節度見吉州太守觀所集為開封譜濟甫之生在浙
亦由京兆徙有曰翼晉左將軍吳興司馬十世至義誠
唐太子舍人密州司馬密州之缺子子元以通易老莊
侍讀後乃徙宗正卿事具密州墓志及唐書儒學傳子

元之曾孫克遭巢寇亂避地黃墩因僑居浮梁之曲溪
卒遂葬曲溪其子新家初門武溪四世有守榮析居板
石板石距武溪十里許又四世至澹軒府君景傑登紹
興丁丑乙科調忠南教授桂陽今年未七十以奉議郎

致仕始居番陽是於濟南為高祖曾祖勝千祖必和父
震之俱不仕濟南諱桑字濟南資性靜慎敬事重親無
家庭之過撫弟妹有恩決宗姻有禮交隣曲有道從祖
茶陵主簿必厚禮部進士夢薦以鄉先生教學嘗往受
業詞藻記覽為同輩推許然試場屋輒不利濟南一無
沮容浮沉觴咏陶寫圖史充然若它有所獲者生平足
不履官府中更徭役裁冠博帶與塵土相持終其身家
敝猶招師好客不少廢有司採能名檄授徽州紫陽正

不赴郡校延為耆儒吉月必黽勉一至焉所居南榮樹
橘成林里人稱之為橘林先生生乙未三月二日大德
癸卯嬰風脾疾明年三月一日遂卒年七十有八明年
十一月某日祔查勾又二年丁未某月某日窆某鄉某
塢娶李氏子男二朝瑞朝賢女一適進士胡安榮孫男
五彥博彥才護孫月孫圖孫女孫三曾孫男四洙泗沂
泰余不及識濟甫而嘉鄉貢之文教授之請知其世之
多賢而教行於子孫也乃為之銘曰維橘不遷鬱而成

林後有聞康叔之風而訊其牒者雖去之百世其獨無
心噫嘻乎斯今

故瀏陽教授李君墓志銘

君諱夢登字仲實李氏越餘姚人餘姚之李自遠祖唐
相國紳帥越遷其籍至君曾祖潤迪功郎祖章承務郎
皆跗鄂相承父碩以太學詞賦高選中壬戌進士鼎科
仕至從政郎台州教授早卒母黃氏安吉州歸安令申
女也從政初壻黃即授館其宗歸安見從政有成甚喜

既不幸而君與伯氏午發髻鬣能斬斬刻厲孤露中已
愛期之以為李氏之不亡庶其在此當是時東南士大
夫席聲望憑膏澤以官學相薰李黃又餘姚高門語少
俊者必齒二孤然常小試捷大試卒不偶年遷歲移而
舉罷不及售矣至元丙子鄉校燬帥鄉人新之於是提
學趙公孟至聞其才檄充徽州月泉山長不赴郡別駕
溫公廷玉行縣訪遺佚得君薦於浙東部使者部使者
核覆得實移有司上名中書行署授明學正明於餘姚

為隣州明之儒先如內翰深寧王公猶無恙聞君之來
動色相慶內翰即從政仕台時員外司馬也君虛心事
賢直躬贊長肅客合羣有蔽通之有忤調之有危掖之
儀門書閣禮殿論堂齋廡諸役有煩任之錢穀會計有
籍公之寮案憤訟如潰河而庠校賴君不廢郡遂以學
事委君主攝既而秩滿扁舟賦歸蒔花樹木為休閒之
計所居之室曰雲心並西一軒曰帶經客至瀹茶清言
銜盃浩歌類古之樂天知命者大德丁未孟春有命授

瀏陽州教授五月二十六日以疾卒於正寢生甲辰十二月二十八日年六十四娶趙氏先二十年卒子男三長文龍早世次德麟女五長許適孫氏餘尚幼孫男三昌孫昇孫曷孫女三余之生長君十月為同甲嘗入太學於君家世為同舍比來明同游相好覩公謹重縝暢疎財急義未嘗無思齊之想君平生以門戶邱壟為重既幸脫民板襲儒蔭戒子孫勿輕舉動慈水之招提曰金仙與祖塋相望捐田租三十斛以奉香火族故稀少

歲時會集必盡歡洽有不給者亦贍周之嗚呼賢哉德
麟將以某年某月某日葬君某山之原而請銘銘曰嬰
幼者皓塵勞清素幸完而歸以面禰祖英英新邱龜從
筮良勿震驚之視此銘章

樓府君墓志銘

士之間居有能以家世積累自重而不繫於榮名勢祿
者吾聞諸鄉井得一人焉曰樓君與夫君諱師默與夫
字也樓之籍在明奉化忠義鄉自十一世祖銀青光祿

大夫茂邾始奉化之壤本為鄆鄆沒改名奉化而鄆別
為縣銀青徙自吳當唐季佐吳越王為鎮海節度往來
駐屯二縣間誥詞有公忠奉職信義脩身之褒晚歲愛
奉化鄆陽鄉山水卜築而居之鄉人感其惠死廟食於
鄆之橫溪至今而鄉名遂易為忠義蓋取誥詞云曾祖
先哲祖紀父奎皆不及仕君世業儒天性恭儉慈孝尤
樂於施予里中有鬪訟者正色語以枉直往往愧止治
生無鉤距餘暇歌酒自娛賓朋故舊過門從容燕款人

人得其歡心齒髮衰暮條然如欲脫去世俗機械遇山林物外雲簷雪屐之客意相投而色相喻也一日命家人曰吾死期至矣汝曹勉之時大德甲辰五月三日明日遂不起生以丁酉十一月二十二日壽六十八娶董氏先二十三年卒繼室陸氏子男二復翁全翁女二於是諸孤將以某年某月某日葬君鄧豐樂鷺東之原而求乞銘銘曰孰有能分宗累百祀而不替其家之人也意行而不躡道隱而無華悠悠乎其又何嗟

孝善胡先生墓誌銘

元貞乙未歲冬十月十有七日徽婺源考水胡公卒聞
卒之日自公州里宗黨知識若遠外學士大夫皆嗟歎
失聲以悲其門人弟子俞洪等一百十五人相與考次
公平生言德用古隱君子私謚例尊稱之為孝善先生
公之世本出江南李氏金陵圍急逃來寄姓為胡因籍
焉其子昌義遂以明經中科九世至國子司業仲與同
郡汪內翰藻齊名元符太學所謂江左二寶者也弟侃

亦著書有棣華集存於家自是又三世徙考水居婺源
郭東集賢里者以學行推擇為鄉校正諱允濟於公為
王父四世有通五經尤精易傳史纂者易簡居士諱師
夔於公為父一門十餘葉緗素相傳故徽之他胡雖多
而獨考水之宗號明經胡氏公諱斗元字聲遠少孤師
朱文公從孫小翁受書說年十四始從小翁聞居士所
授易學刻意探述日玩一爻至七日則通玩六爻循環
習之無窮白首以為常亦以此教其徒當貢舉法行徽

士橐楮筆起山林出與四方英俊爭進趨往往高捷鄉國每三歲上公名成均有司不足以知公至輒聞罷乃徑歸閉門養志以自樂然慕從之遊者遐邇如歸餐華茹實人人去為良儒嘗曰乾專言善坤兼言善不善乾之善世吾無及已坤之積善吾庶幾勉之尤以不逮養為終身憾春秋朔望拜祀像涕泗不能已塋壠親躬拜掃老不避勞人謂年彌高而慕彌深者於公見之噫公誠可為孝善也已年六十時忽語諸子吾筋力覺衰遊

人間世當可餘十稔顧吾本懷常在考水念之不能一飯忘吾死汝輩必葬我考水高倉至是臨訣復屬諸子我家明經胡氏子孫汝輩幸力學積善毋辱我享年七十有二諸子以丙申秋九月十九日葬公高倉太守涿鹿翟侯大書孝善先生胡公之墓娶魚氏子男三炳文煥文燦文女一孫男四念祖進祖光祖德祖女四於是炳文以前進士程君龍江君雷胡君次焱之狀與議來丐銘銘曰燕其獨轟其伏既安既穆是為孝善之卜

張允甫墓誌銘

往時江南以太學養士至累千人業六經若詞賦者雖
不特置博士而常往來通泣之然詞賦獨多其數常不
與六經等於獨多之中業之而精者自閩浙江湘嶺蜀
諸生甲乙可一二數開慶己未歲混試補弟子員吳門
張允甫與焉又明年春自外舍試中優等升內舍為太
學詞賦第一於是聲譽陡起允甫又謙粹修重凡同業
無不願與之游而先生長者尤相敬厚自是十年再試

中國子監舉又試中平等奏名遂自內舍升行上舍事
為諸生長貳領袖旦夕解褐賜官而太學廢允甫恬然
無得喪意談笑浮沉里巷又二十年而終始余於允甫
同業中年輩差晚每堂廡間望見儀觀整整私心歎想
自失既先竊一科去癸酉秋被傲考校兩浙進士同寮
陳文林方叔為余言允甫賢行甚詳尤恨前時不得數
數相從也及余晚自金陵歸鄞文林亦自合肥趨杭竟
託孥允甫家允甫優廩廩之文林病死允甫醫藥殯之

如私喪文林蓋疇昔太學閩士所與同業尤相敬厚之一也余愈益慕允甫有氣誼真能不負生死緩急如此欲終與之游而其子觀以狀來謁銘允甫以至元癸巳冬十二月四日死矣嗟乎傷哉按其狀允甫初名公顯避諱改士元曾祖彥琦朝奉郎祖仲父孝德迪功郎世為平江常熟橫涇望族允甫之季年始徙居杭死遂葬杭南高峰下麥嶺橫涇之居初纔中產迪功君單傳承家性坦踈無鉤距賢業不營而裕允甫遵用其道加豁

達好施與平居一衣不輕服一膳不過殮至移於師友
饋謝閭里賑貸學校營繕驩如也事親孝內舍奏名時
迪功君見之喜曰吾教子無憾矣尋執喪服闋即不汲
汲進取以母陳氏年耄謁假歸養既乃艱闕跋涉扶持
風雪中得股膝筋寒疾天陰晦輒發動良苦他日杭居
有火警盡棄積貯急掖母行止與俱如初無苦者人以
為至誠之助無幾何疾復作竟劇劇且絕獨力憊訣母
囑治斂必以儒服年五十有九葬以甲午某月某日子

男一觀也銘曰不為之鬻亦莫疵吾玉不為之趨亦莫
跌吾車其豐吾存也吾發其餘其潔吾歸也吾復其初
噫嘻吁乎後百年千年尚勿震吾幽貞之居


李思宣墓誌銘

君諱洙字思宣李氏饒浮梁人浮梁李世為江南明經
高科聞家贈朝奉大夫諱詡者君曾大父也太中大夫
刺諭制四蜀改刺潭安撫湖南以寶謨閣學士致仕特
進諡忠靖諱遇龍者君大父也奉議郎刺信嘗入知大

宗正丞今以老屏居於家名雷初者君父也宗正公初娶某氏後娶朱氏封孺人數文閣學士天官卿諱貌孫之女而君妣也君生之四年以特進遺表恩授將仕郎又五年以覃恩循資擬轉修職郎又六年始冠又三年授室新安康氏又二年生次男樂父又四年當至元甲午以薦上江浙中書行署板授饒學正又四年考滿詣吏部格當注州教授垂仕矣明年死燕逆旅中大德己亥秋七月五日也年止三十五前死託其友貴溪張君

時舉必歸我骨浮梁葬必築亭曰存亭豫自書存亭記
孟子修身俟命不貳而歸於張先生存順沒寧之義凡
二百餘言皆有條貫既自寬釋冀病少愈亦可慰吾親
使知非如他人輕生徒死者以捐其憂嗚呼傷哉始君
自垂髫而目厭朱紫耳熟珎瑤稍長連貴婚兩家所與
賓游談論皆天下大人長者豈屑躁意名祿憫親年高
欲代門戶事勢不得自逸故盤薄遠出然不意竟至於
此殆真有所謂命邪死之明年春二月君之喪至自燕

城衣冠士大夫識與不識嘗為出涕又二年壬寅冬某月某日葬浮梁某山下存亭在焉銘曰生不蠱其躬死不沒其名去兮霆騫歸而颺奔斯人也殆庶乎存存



剡源文集卷十六

欽定四庫全書

集部
剡源文集卷十七

詳校官中書臣閔思毅

主事臣呂雲棟覆勘

覆校官中書臣方大川

校對官學正臣李巖

謄錄監生臣于希賢

欽定四庫全書

剡源文集卷十七

元 戴表元 撰

墓表 墓碣

宋氏墓表

東昌莘宋氏有為信州推官者嘖感而謂其僚剡源戴表元曰吾宗之先鄆人也鄆今為東平府吾宗之居東平陽穀十八都獅子堂其西北曰石佛堂者葬域在焉金之季年兵燬漂搖士大夫家莫能知有譜牒世次而

宋氏之可聞者斷自吾祖嘗為軍千戶千戶府君娶東昌莘姬氏生吾父府君後娶莘孫氏因居莘為莘人初千戶府君昆弟五人同時死其四惟號五公者在五子傳一子承陽穀之業千戶府君亦死葬陽穀死三月而吾父始生姬夫人抱遺孤居陽穀兩年會難作徙莘姬之父母憐吾家單子又不可託數數欲奪志改適吾祖母誓死守節者十四年乃以病死莘而歸葬陽穀吾父府君生長莘性溫恭悃慤無機穽莘人至今稱其行生

庚辰四月八日死戊午四月二日年三十九死之歲吾
母孫夫人年纔三十六襲姑之化却鉛澤服素縞以嚴
儉持家終其身雖比隣無故少游接而鄉閭姻族歲時
慶弔無闕禮吾賴教育徽倖成立至元十六年以尚用
監史值進俘寶隨監長忻都廷見蒙賜白金爐合等器
五十兩吾母見之喜曰此汝家先世遺慶汝何以及此
宜自愛十七年勞調充征東行中書省掾尋改充江淮
行中書省掾二十五年調承事郎鎮江金壇尹滿再調

徽祁門尹吾母皆及就祿養凡蒞官行事朝夜警督備至馭下慈臧獲有過譴逐必痛責子婦使復還中外母敢犯教年七十四死祁門生癸未七月三日死大德丙申十一月十七日臨訣呼諸子前曰我起艱窶至今日死不恨惟爾祖墓在陽穀爾父遺體寄葬莘城北恐散遠不得展省以為念汝等豈能誨吾言乎言訖而瞑祁門歸吾不孝不獲亟遵吾母言姑藁葬吾母揚州以俟後歸今信府秩且復滿年加髦衰如有不可待及於大

故將何以見吾母地下既卜吉於莘城西三里新張保
將用大德某歲某月日陽穀遷祖考千戶府君祖妣姬
夫人之窆併奉莘地揚州考妣合葬惟宋氏存亡繼絕
實憑二妣婦節母範苟延蒸嘗為衣冠家誠不忍遺負
先德按士禮子孫追榮其親得植墓表刻石器子宜為
文辭以慰吾志表元辭不獲命謹實錄底裏鐫載琬琰
揭之壟上使人知夫世之為善無不報而幽閨窮巷孀
嫠寡弱服勞秉節於冥冥之中者天必憐其貞苦榮之

以賢子孫使之康強壽頤而享食其效於以旌孝思勸厚俗非曰褒飾而已推官父諱衡母孫氏諱妙貞推官名或弟仲某早世季彬推官之子萬里彬之子萬鈞萬美宦學蓋方興未艾云

徐使君墓表

信上饒徐公卒於員郎二千石既葬其縣之石橋鄉南徐大塘塢者三十七年而墓碑不立承學之士以為公名蹟在史冊行業在鄉閭誠不待是而顯著然愈遠亦

恐墜逸無以異觀瞻昭永久乃相與來諭於剡源戴表
元頗有以紀之按徐氏世緒遠出偃王居信者尤多顯
人公諱子卿字奇仲少穎悟日誦數千言族父忠公元
杰每曰是子必亢吾宗嘉熙丁酉遂以詞賦魁鄉貢戊
戌試禮部中進士科人為公喜公曰時方以此取士吾
不得不爾耳授迪功郎隆昌南昌尉尉治左有南州高
士塚荆蕪沒人一日命雉去築思賢亭以見志轉運使
何君處久傾盖器重檄攝郡文學尋檄分司撫州小事

許專決州苦和糴斛面及田宅稅契錢為民害立罷之
再檄瑞陽如在撫考滿未謁選會趙信父視師江上欲
屈公而淮西總領所辟監鳳臺酒庫因赴其聘而兼贊
趙公幕府當是時軍興事煩公年少入預籌畫出理鞭
算精采獵獵諸公間用趙公荐特差充兩浙轉運使司
準備差遣榮王府奪民田公斷歸民田王怒語侵使林
使公改斷公曰吾職可削筆不可改也輦下供億重歲
入不足以支搏節出納作漕計本末一書示來者癸丑

春以考舉及格改官授臨川民喜見顏色問是吾分司
公耶至則興學立黃勉齋先生祠清版曹宿負覈經界
隱籍邑以大治有殺人委於隍者吏執王應亨奴主七
人鍛鍊誣服公白郡改鞫殺人者常平司都吏馮汝能
也事聞轉一官舊例試院未揭名許健者疾足報捷以
邀厚犒乙卯秋舉禁卒與馬營爭其利致閉郡守主兵
官不能制且亂公單車往諭咸聽命廣縣解創蓮華漏
建相業堂成皆自為記包樞密聞其政謂人曰江西五

十餘縣臨川第一丁巳除尚書檢閱官書擬右司文字
初立朝感激欲言事輒劄入乞建儲不報戊午出通判
平江改嘉興守挾同袍為執政傲復甚公極力規正不
可則以監州不職自劾守為歛戢悉却俸外無名事例
作一杯水亭暇日嘯咏其間愉如也除太常寺丞就守
嘉興命下丁母憂去家食不通貴人書疏婆娑東山下
自號東山翁文酒耕漁相娛數年以疾卒生壬申八月
四日卒甲子八月二十一日得年五十三曾祖功懋妣

王氏祖思聰妣陳氏父質通直郎兩浙轉運使司主管
文字妣張氏贈安人配華氏通直郎建寧嘉禾令君女
性端淑儉恪佐公居官無紛華意公盛年思退贊其決
盡義嘉興歸相張安人喪盡禮公疾侍藥盡勞卒持制
盡哀通直公在堂華缺通直亦老迎致相驩養盡誠宗
姻鄉黨急乏賙貸盡惠既貴不忘蠶桑常夜績課兒誦
書教盡方生壬午三月二十六日卒至正壬辰十二月
丁酉以遺命葬鄭塢距公墓八百舉武而近子男三忠

甫歷上饒南城建平三尉有能名次迪吉登仕郎出為
外家後先卒次志甫以軍功補官垂換授州教授卒女
道韞適池州教授管茂孫男二拱辰徽州教授次宿老
女二曾孫男若干女若干公生平為文有體裁自舉子
時聲撼場屋及宦學東西師友益廣如袁廣徽兄弟湯
伯紀父子徐景悅蔡仲節諸公俱以剛介廉靜見交在
淮西暮年增餉額十一萬有奇奏減磨勘十一年耻自
陳併他賞皆不敘呂節使文德舉親民却不受在兩浙

吳謝二相賢公爭致門下兩辭之在右司當宁顧輔臣
稱信有三徐可進用指公與忠愍公之子直諒台守宗
仁也丁大全貪其功誘公監察御史且囑以林叅政彈
文公曰臺官可為當路私人乎即日告假出關去里居
服闋有荐於朝予江西一州不拜予歸班不拜翁祭酒
馮舍人皆同年在朝屢道賈平章意將處之清要以父
年八十不可出力辭終父之世不過朝奉郎賜紫魚服
嗚呼科舉法敝久矣敝極則可廢然由隋唐以至近世

所得名卿材大夫不少其人必皆沉潜好氣節疏通知
體要無有肯遽然闖茸不振者而風骨稍高即成竒傑
盖其獲之也不以求而以知責之也不以役而以禮故
人人得自持重而盡其材余生晚雖不逮事公即公之
淵源趣向皆耳目所睹記賢者不必以不仕為高仕矣
天下共名為奸邪者嫉之不可主天下或名為奸邪或
名為忠良者疑之不可主至於天下共名為忠良可主
而亦不苟就焉若公之落落於吳謝丁賈之間所向偃

蹇盤旋孤行直立此非可徒以科舉士論也昔者延陵
義死墓有旌題仲舒貧葬行路展禮庸敢竊附二賢之
例揭之壟端使百世之下想遺風談故事者猶有所考
不亦可乎

五山陳公墓表

嗚呼是為信上饒五山陳先生之墓公之世本籍玉山
後稍徙上饒沙溪之旁有五山公晚居其間學者因尊
稱之為五山先生焉方公少年上饒多名士大夫徐祭

酒父子韓直院兄弟諸賢為領袖疊山謝氏城山林氏
藍山張氏之徒為羽翼風采扇動東南而公生世家能
以義氣招致衣冠俎豆不徹於門篇章箋翰日積其席
乙卯秋尋用詩賦充鄉貢州人謂一蹴且躡通衢雲遊
矣春官失之恬不以介意益廣問學築室聚書闢館聘
客笑談步趨皆有法度久之名成行孚鄉鄰有爭則聽
之決官府有急則倚之助蓋古之善人君子布衣韋帶
而尊於王公重於專城者其道類如此也丙午兵起始

避孔道入深谷
茆舍相依者至數百家
藥病飯饑全活
甚衆事定起領邑校掃燼地立講廬
於是大會民數郡
博士以儒籍為憂託公扶之聞命不辭
殫勞罄資凡留
連省户下踰年
迄脫同袍於編氓而歸會廣信闕長長
廣信州將部使者聞其名方議薦擢而公竟還五山遂
終身焉喜為詩有古近體并雜著若干卷藏於家性篤
直好義重然諾見人善稱誦如已出及聞其惡一不掛
口待交游能始終犯不較施不伐由是無絲粟怨嫉於

人美鬚眉者年華皓意行郊廬間識與不識望之知為
吉德諱堯龍字繼臣曾祖伯運祖德寧父良才世為儒
娶鄭繼張皆先公卒又繼施氏子男三公美舜懋早世
次舜清婺州永康教授女二適徽州婺源學正祝廩次
適趙諮皆鄭出孫男六禹疇禹錫禹遠禹範禹謙可崇
女二曾孫男若干女若干年八十生壬午正月八日卒
大德五年九月十日葬五山西十里雙峰以其年十二
月庚寅公事親以孝聞居父喪治葬極盡力至是雙峰

亦自卜余之來後公死纔一年每臨事接物興扳援不及之歎嘗作詩哀傷之又以事嘗至五山亦及拜雙峰阡婆娑松檜撫問泉石遺風猶存顧安得復有斯人乎其子孫多善文雅喜從余游爰采家乘訂以鄉邦公言揭辭植表雙峰之下使後來為者知勸慕云

徐耕道遷葬碣

歲甲戌乙亥余客金陵四幕文武掾佐浮沉往來以千計徐君耕道在數中余接之不及稔也爾後三十年来

上饒於君為鄉始獲知君之家世出處及誦君詞賦盖
上饒之徐自衢徙而居世黃塘諱元得字耕道曾祖賜
迪功郎祖植禮部進士父華甫自號橘隱翁世以儒素
科級自重至君從兄忠愍公遂為壬辰進士第一人仕
終於大司成冬官二卿當忠愍公時四方官學之士無
不願登其門君攜超穎之質入則與二季端友龍圖立
大侍郎綢理書疏出則與趙茂實尚書徐景說秘書輩
商略義理及既不得志場屋而遊則與揚州李制置江

州趙安撫之徒講畫籌策遊倦而歸則與蜀郡楊恭預
天台葉集賢諸公考問故實聲漸氣摩意諭色授不勞
而成良器江淮舊稱功名馳驟之地嘗奉檄築懷遠軍
城補進勇副尉升授滁州散祗候移淮陰文家峰巡檢
淮陰尉進保重慶轉進義副尉又剿廣益盜湘南轉進
武校尉又五轉自承信郎至忠翊皆身犯矢石得之非
他書生用空言寄功幕府之比然盤旋曲折亦不足盡
其才而歲年老矣於是歸傍鄉井既而避地於饒德興

之宗儒村宗儒有王氏故大家能以禮館穀君學徒為之填委會李制置弟宰祁門於德興鄰邑也復招游祁門為刊所為詩詞曰橫塘小草一筆二筆者若干篇君平生輕財有俸餽即散以周人之急故晚而益貧三年不得已遂歸黃塘課子讀書督奴灌畦殊不為前時意度閒暇惟去宗族鄉黨相倡和命詩社曰明遠并主隣社香林社友又為刊小草六筆者若干篇癸巳夏感疾至秋加劇索紙作書別所嘗交往有此行遙指柯山云

云數十字若寓升遊洞天之意書畢而逝十月某日也
生庚辰十一月某日年七十四葬之新卜在祖塋白土
山側子男四長某次某皆早世次某出為衢官堂宗人
後次直謙銘曰不局於趨亦不失吾儒不急於營亦不
害吾生大袖長紳魁顙豪膺閱此佳城

周府君碣

饒安仁周君諱文清字清之年六十四以至元辛卯二
月十六日卒乙未二月二十七日既葬於附郭之譚山

而石表未立其孤懼無遠於芻牧持武岡王侯之志來
請銘按志君曾祖諱某祖諱遠父諱志家世循良君早
從鄉縉紳問學恬於進取而訓兒女一以孝悌忠信邑
大夫推其賢尊為耆宿常禮貌之歲饑荒力勸賑恤人
有鬪鬩為質決是否皆喻而止安仁路當孔道每觀風
問俗之使至納其雅言民受寬賜晚歲益屏人事灌畦
種蔬以自樂號愛圃翁文士賦詩盈編君不介意頗好
西方之書繙誦梵譯若有深得者迨婚嫁將畢遂感疾

命家人衣周身棺周衣脩然而逝世之談儒者嘗詆釋
氏為誕其弊也華言雅趨而少誠慤觀周君之於出處
死生之際不近於有恒者邪君生於戊子六月二十四
日先娶李氏繼夏氏俱先卒子男三宗堉宗懋李出宗
允夏出女一嫁支以良孫男三女四銘曰吾聞適邱墓
道不施哀而哀生嗚呼茲岡吉人之藏其固其康

剡源文集卷十七